

## Evening Dogri News

09 June 2024

18:15 Hrs

### Headlines

- नरेंद्र मोदी उप्परोतली त्रीस बारी भारत दे प्रधानमंत्री दे तौरा पर अज्ज सगंध चुक्का'रदे न, नमीं मंत्रि परिषद गी बी अज्ज गै सगंध चकाई जाग।
- प्रशासनिक काउंसल नै जम्मू कश्मीर च बक्ख-बक्ख उद्योगिक इलाके विकसित करने लेई 2 ज्हार 25 कनाल जिमीं मुंतकिल कीती। श्रीनगर दे टूटू ग्राउंड च मनोरंजन पार्क बनाने दी बी मंजूरी।
- फौज दी 15 कोर दे जीओसी लेफ्टिनेंट जनरल राजीव घई होरें आखेआ ऐ जे जम्मू-कश्मीरच विधानसभा चुनां कराने कोला पैहले हालात पूरी चाल्ली स्थिर बनाने दे जत्त जारी।
- केंद्री शिक्षा मंत्रालय नै नीट दे मतेयानें दे नतीजे गी लेइए इक जांच कमेटी खडेरी ऐ।
- आई.आई.सी-टी-20 विश्व कप दे इक मैच च अज्ज भारत ते पाकिस्तान दियां टीमां आमने-सामने होडन।

<><><><><><>

### PM Swearing Ceremony

राश्ट्रपति द्रौपदी मुर्मू होर मनोमीत प्रधानमंत्री नरेन्द्र मोदी ते उंदे मंत्रिपरिषद गी अज्ज संजा सवा 7 बजे राश्ट्रपति भवन च औहदे ते राजदारी दी सगंध दोआंगन। राश्ट्रपति होरें नरेन्द्र मोदी होरें गी सरकार दे गठन लेई साद्दा दित्ता ऐ। शुक्रवारें मोदी होरें राश्ट्रपति हुंदे कन्नै मलाटी लाइयै सरकार दे गठन दा दावा पेश कीता हा। बीजेपी दे अध्यक्ष जे.पी.नड्डा हुंदी अगुवाई च राश्ट्रीय जनतांत्रिक गठबंधन एनडीए दे शिष्टमंडल नै राश्ट्रपति हुंदे कन्नै मलाटी कीती ते नरेन्द्र मोदी होरें गी बीजेपी संसदीय दल दा नेता चुने जाने सरबंधी पत्र सौंपेआ। एनडीए दे सैह्योगी दलें दे समर्थन पत्र बी राश्ट्रपति होरें गी सौंपे गो। साढे संवाददाता नै जानकारी दित्ती ऐ जे केई सारे गोआंठी मुखें दे नेताएं गी इस समारोह लेई साद्दा दित्ता गोआ ऐ। समारोह च भारत दे गोआंठी मुखें हिंद महासागर क्षेत्र दे नेता ते होर दुए मन्ने परमन्ने दे लोक शामिल होंगन।

<><><><><><>

### PM-Tea Party

मनोनीत प्रधानमंत्री नरेंद्र मोदी होरें अपने शपथ ग्रहण समारोह कोला पैहले अपने घर इक चाह पार्टी दा सरिस्ता कीता जेदे च बीजेपी दे वरिष्ठ नेता अमित शाह, जे.पी. नड्डा, डॉ. एस. जयशंकर, धर्मेन्द्र प्रधान, पीयूष गोयल, ज्योतिरादित्य सिंधिया, किरेन रिजिजू ते होर दुए नेता शामिल हे। लोक जनतांत्रिक पार्टी "राम विलास गुट" दे प्रमुख चिराग पासवान होर बी प्रधानमंत्री निवास पर पुजे।

<><><><><><>

## Adm. Council Decisions

लेफ्टिनेंट गवर्नर मनोज सिन्हा हुंदी प्रधानता तैह्त कल लग्गी दी प्रशासनिक काउंसल दी बैठका दरान बडगाम, अनंतनाग, शोपियां ते रियासी जिलें च औद्योगिक एस्टेटें दे विकास लेई 2 जहार 25 कनाल ते 3 मरले जिमीं मुंतकिल करने दी मंजूरी दिक्ती गई ऐ। प्रशासनिक काउंसल नै किश्तवाड जिले दी नागसेनी तैहसील दे गलहार भाटा गां च कीरू पनबिजली परियोजना लेई 1 जहार 750 कनाल 17 मरले जिमीं 40 बरें लेई पट्टे पर चनाह वैली पाँवर प्रोजेक्टें प्राइवेट लिमिटेड गी देने दा बी फैसला लैता ऐ। इक होर महत्वपूर्ण गैहू तैह्त प्रशासनिक काउंसल नै श्रीनगर दी टाटू ग्राउंड च 139 एकड़ शा मती जिमीं पर मनोरंजन पार्क विकसित करने लेई विशेश स्पेशल पर्पस व्हीकल लेई भारत सरकार गी प्रदेश सरकार दी सैह्यति जताने दा बी फैसला कीता गेआ ऐ। इस पार्क दे राएं प्रदेश च सैलसफा गी खरा मता बढावा थहोग ते इस पैहलकदमी गी केन्द्र सरकार दे सैह्योग कन्नै तोड चाढेआ जाग। एह्दे राएं राजस्व ते रोजगार च बी बाढ्हा होग।



## GoC-15 Core

श्रीनगर आधारित 15 कोर दे जीओसी लेफ्टिनेंट जनरल राजीव घइ, होरें आखेआ ऐ जे इस बरें सितंबर थमां पैहले-पैहले होने आले विधानसभा चुनां दे मद्देनजर सुरक्षा दे पुख्ता इंतजाम कीते गेदे ना। एहू गल्ल उनें बारामुला च आयोजित कार्यक्रम दौरान आक्खी। एहू कार्यक्रम विपिन रावत स्टेडियम च कारगिल युद्ध च शामिल सैनिकें आस्तै खासतौर पर आयोजित कीता गेआ। पत्रकारें दे सौआलै दा परता दिंदे होई पुलस महानिदेशक आर.आर स्वैन होरें आखेआ जे जम्मू-कश्मीर च 70 थवां 80 विदेशी आतंकवादी सक्रिय ना।



## DG-Rural

जम्मू-कश्मीर च ग्रामीण स्वच्छता सरबंधी महानिदेशक अनु मल्होत्रा होरें नुनवन ते चंदनवाडी दा व्यापक दौरा लाया तां जे औंदी श्री अमरनाथ जी दी जात्तरा दी त्यारिएं दा जायजा लैता जाई सकै। एहू जात्तरा इस म्हीने दी 29 तरीक थवां शुरू होआ रदी ऐ। मौके पर डीजी होरें त्यारिएं दा जायजा लैता। उन्दे कन्नै ग्रेविटी प्राइवेट मैनेजमेंट साल्यूशन्स दे नुमायंदे बी मौजूद हे। एहू फर्म पवित्र गुफा दे रस्ते च आरजी शौचालय बनांदी ऐ। उनें सुविधाएं ते सरबंधी कम्में गी समेंसिर पूरा करने लेई आखेआ तां जे जात्तरा शुरू होने थवां पैहले सारे कम्म निब्बडी जान ते जात्तरा सुचारू सिर चली सकै। उनें महिला श्रद्धालुएं लेई खास पिक शौचालय बनाने लेई गलाया तां जे महिला यात्रुएं गी सुविधा होई सकै। अनंतनाग दे डिप्टी कमिशनर डॉ. सईद फखरुद्दीन हामिद होरें बी श्री अमरनाथ जी दी जात्तरा दी त्यारिएं दा जायजा लैता।



## Gharana-Wetland

आर.एस.पुरा दे घराना वेटलैंड च सैलानिएं गी आकर्षित करने लेई तैयारियां जोरें-शोरें जारी ना। उत्थे हर बरे साइबीरिया ते होर केई यूरोपीय मुल्लें थमां प्रवासी पक्षी औंदे न जिनेंगी दिक्खने लेई आर.एस.पुरा दे सुचेतगढ बन्ने कन्नै लगदे घराना इलाके च सैलानिएं दा मता रश पौंदा ऐ। जिसे दिक्खदे होई होर बेहतर सुविधा सेवा उपलब्ध कराने लेई जन्न कीते जा रदे ना। जिला जंगलात अफसर विजय कुमार होरें इ बारे जानकारी दिंदे होई दस्सेया जे इस इलाके सैलानिएं दे आकर्षण, मनोरंजन ते सुविधाएं लेई मते सुधार कीते जा रदे न तां जे इत्थे औने दा बेहतर तजुर्बा हासल करी सकन।



## NEET

शिक्षा मंत्रालय नै राश्ट्रीय मैडिकल स्नातक प्रवेश मतेयान नीट दे 15 सौ थमां मते मेदवारें गी ग्रेस मार्क्स दित्ते जाने दी समीक्षा आस्तै इक पैनल कायम कीता ऐ। राश्ट्रीय परीक्षा अजेंसी एनटीए दे महानिदेशक सुबोध कुमार सिंह होरें दस्सेआ जे पैनल दी अध्यक्षता संघ लोक सेवा आयोग दे साबका अध्यक्ष होर करगंन। एह समिति इक हफ्ते दे अंदर अपनियां सफारशां देश ते मेदवारें दे नतीजे इह समीक्षा बी कीती जाई सकदी ऐ। मैडिकल ते डेंटल प्रवेश परीक्षा दे नतीजे 4 जून गी घोशत कीते गे हे। केई मेदवारें सुआल पुट्टे होई परतियै मतेयान दी मंग बी कीती। केई मेदवारें अदालत च मामला दर्ज करोआया। नीट आस्तै 24 लक्ख शा मते विद्यार्थिएं पंजीकरण कराया हा ते 97 फीसद मेदवार मतेयान च बैठे हे।



## Female-Supervisor Exams

फिमेल सुपरवाइजर दे म्तेहान सुचारू ढंगै सिर करोआने लेई पुंछ दे जिला प्रशासन नै 320 कर्मचारिएं गी खास सिखलाई दित्ती ऐ। इस जन्न च 300 महिला कर्मचारी ते 20 पुरुष कर्मचारी हे। एह म्तेहान एस.एस.आर.बी आस्सेआ आयोजित कीते जंदे ना। एह सिखलाई म्तेहान गी सुचारू ढंगै सिर करोआने लेई दित्ती गेई। एह म्तेहान पुंछ जिले च 15 म्तेहान केंद्रें च लैता जाग जेडे पुंछ दी 11 थाहें ते सुरनकोट दी 4 थाहरं पर होने ना।



## Fall Army Worm

उधमपुर जिले दिएं बक्ख-बक्ख पंचैतें च लोकें गी फाल आर्मी वार्म नां दे इक कीडे जेहडा दिक्खने च भै-गुदड़ी आला लेखा ऐ, दी चुनौती दा मकाबला करने बारै जागरूक करने लेई कैप लोआए जा रदे ना। एह कीडा जिले दे केई इलाकें च फसलें लेई इक खतरा बने दा ऐ टकोहदा करिए मक्के दी फसल लेई। इस चुनौती दा मकाबला करने लेई मैहकमा राईबाई नै करसानें गी जागरूक करने ते उपकरणें कन्नै लैस करने दा मिशन तैयार कीता ऐ।



## Dubai-New Job

कारोबारी जगत दे दिग्गजें ते शिक्षाविदें इक सैमीनार च नमीं चली दी नौकरियां पैदा करने ते सेहत सेवाएं तगर पुज्ज बनाने च आर्टिफिशल इंटेलिजेंस दी क्षमता पर चर्चा कीती। सेमीनार दा विशेषार हा “**Future is Exciting**” इसदा सरिस्ता भारतीय महावाणिज्य दूतावास नै भारत सरकार दे वाणिज्य मंत्रालय दे सेवा निर्यात सरबंधी परिषद, दुबई च **Symbiosis International University** दुबई ते दुबई च भारतीय महिलाएं दे सैहयोग कन्नै कीता गेआ। इंटरनेशनल डेटा कारपोरेशन दे वरिष्ठ शोध निदेशक हरीश दुनाखे होरें आखेआ जे ए.आई लेखन ते जनसंपर्क च नमीं चली दियां नौकरियां ते भूमिका पैदा करने जा रदा ऐ।

<><><><><><>

## Youth=Cricket

परेड स्पोर्ट्स एसोसिएशन ते लक्ष्मी क्रिकेट क्लब नै किट्टै रलिए जम्मू दे परेड ग्राउंड च क्रिकेट खेडने दी सिखलाई यानि कोचिंग देने लेई समर क्रिकेट कोचिंग कैंप दा सरिस्ता कीते दा ऐ। इस कैंप च 12 कोला लेइए 16 बरे तोड़ी दी उम्मी दे जागतें ते कुड़िएं गी क्रिकेट दी कोचिंग दिती जा रदी ऐ। पूरे जून म्हीने चलने आली इस पैहल कन्नै मेद ऐ जे मते सारे उभरदे खडारिएं अंदर छप्पी दी प्रतिभा गी पंछानने, नखारने ते बढावा देने दा मौका थहोग। कैंप दा समापन 30 जून गी होग।

<><><><><><>

## India-Pak

टी-20 विश्व कप प्रतियोगिता च अज्ज भारत दा मुकाबला पाकिस्तान कन्नै होग। भारती टीम अपने चिर प्रतिद्वंदी पाकिस्तान कन्नै न्यू यार्क दे **Nassau Country International Cricket Stadium** च मैच खेडोग। एह मैच भारतीय समें मुजब रातीं 8 बजे शुरू होग। इस मैच दा सिद्दा प्रसारण दस्सेया जाग।

<><><><><><>